

摘藻堂四庫全書薈要

集部

欽定四庫全書薈要

聖祖仁皇帝御製文第三集卷十三目錄

勅諭

諭戶部

諭內閣

諭戶部

諭內閣

諭內閣

諭工部

諭內閣

諭內大臣大學士九卿等

諭江浙在京官員大學士張玉書尚書王鴻緒等

諭工部

諭刑部

諭內閣

諭內閣

諭工部

諭兵部

諭工部

欽定四庫全書薈要卷一萬三千九十七

集部

聖祖仁皇帝御製文第三集卷十三

勅諭

諭戶部

江南地方頻年雨暘時若百穀順成閭井黎氓咸得遂生樂業但民間夙鮮蓋藏禦荒無術一遇歲歉即有匱乏之憂朕屢次南巡素所洞悉今年自夏入秋雨澤愆期該督撫先後奏至因念小民久未被災驟罹荒旱所

關甚鉅隨命九卿等速同詳議應行事宜業經勅令停徵并發倉穀賑濟顧倉儲數少未足徧給惟各州縣截留漕米可以實惠及民目下時已屆冬總漕桑格無事著會同總督邵穆布巡撫于準親歷各州縣被災地方備加察勘將今年所徵漕糧每州縣或留八九萬石或留十萬石酌量足支賑給之數分別多寡存留支散及今漕米尚未開兌截現收之糧以濟待哺之衆實於民生大有裨益此朕殷殷懷保赤子軫念如傷之至意爾

部即移文該督等實心奉行仍開具賑濟實數奏聞特諭康熙四十六年十月初七日

諭內閣

今觀部院衙門司官甚是不及京察甄別既經停止若不考察漸至廢弛司官雖稍能辦事儻行止不端豈可容留其不能做稿說堂者亦應革退爾等俱係大臣這次考察不可互相徇情或從此衙門遷轉於別衙門時日未久彼此不能悉知著九卿會同考察分別奏聞康

熙四十六年十月二十三日

諭戶部

江浙地方賦役殷繁倍於他省朕屢經巡歷時切軫懷
比年以來業已節次敷恩頻行蠲貸頃因兩省偶被旱
災隨命按數減徵豁免漕欠並分截本年漕糧令該督
撫親往散賑猶念民間素鮮儲蓄生計不充非更加格
外滋培則荒歉之餘未能驟臻康阜茲特再施膏澤用
弘休養康熙四十七年江南浙江通省人丁共額徵銀

六十九萬七千七百餘兩著悉與蠲免其今年被災安
徽巡撫屬七州縣三衛江寧巡撫屬二十五州縣三衛
應徵地畝銀共二百九十七萬五千二百餘兩糧三十
九萬二千餘石浙江二十州縣一所應徵地畝銀九十
六萬一千五百餘兩糧九萬六千餘石四十七年亦俱
著免徵所有舊欠帶徵銀米竝暫停追取俟開徵時一
併輸納務使小民一歲之內絕跡公庭安處隴畝俾得
優游作息經理農桑庶幾閭閻氣象可以日加豐豫諭

旨到日該督撫體朕孳孳惠愛黎元至意各飭有司實心奉行仍張示通曉令咸知悉儻蠲除不實致有侵冒察出定治重罪爾部即遵諭行特諭康熙四十六年十一月初二日

諭內閣

福建內地之民住居臺灣者甚多比來洊罹災祲米穀不登在土著之人猶可採捕為生內地人民糧食匱乏在彼地既難以自存欲回故土又遠隔大洋前來無力

如此情事誠為可憫著行文該地方官察明情願復歸鄉土者或遇兵丁換班之船或遇公務奉差之船令其附載帶回原籍康熙四十六年十一月十一日

諭內閣

拐賣人口者從重治罪於理極當但買主不治重罪則人何由知警拐賣之事亦何由止息嗣後有買主審實知情者或併妻子解京或充發遠省則買人者知所畏懼必細察來歷始買而拐賣之事亦決少矣可令該部

定例通行康熙四十六年十一月十九日

諭工部

在河各官應酌量才具堪用及有身家人員方可給帑
辦工屢經奉旨如楊芬等無籍微員輕令領帑致有虧
空殊屬不合嗣後凡河官虧帑無追者河道總督及該
管給發錢糧官員應作何處分賠補著一併定例奏聞
康熙四十六年十一月二十日

諭內閣

廣東巡撫范時宗題運使陸曾虧空庫銀著落誑報之
御史鄂洛等賠償九卿議准行甚不合理鄂洛等誑報
之咎但當議處而已以陸曾虧空之庫銀責令鄂洛等
另自照數全賠可乎應著落陸曾勒限追賠如限內不
能全完再議分賠為是前者張霖案內有不當賠償之
項議令賠償朕亦謂不合於理而免之此等不應追賠
者部議雖准朕斷不允行康熙四十六年十一月二十
三日

諭內大臣大學士九卿等

郊祀大典諸臣以天時嚴寒請朕勿親詣行禮朕巡行
塞外水土極其調適駐蹕暢春園水土亦佳是以身體
彊健步履安和毫不知倦竝無頭眩足痛之苦雖尋常
小疾亦一無所萌若果稍有患苦則即遣皇太子或大
臣代行典禮何不可之有今身既無恙可欺妄乎况年
齒漸增正欲乘未老之時躬親行禮耳康熙四十六年
十一月二十三日

諭江浙在京官員大學士張玉書尚書王鴻緒等
朕在宮中無刻不以民間疾苦為念恐遇旱澇必思豫
防至巡幸各省於風俗民情無不諮訪卽物性土宜皆
親加詳考每至一方必取一方之土以驗試其燥濕今
歲南巡江浙見天氣久晴所經河渠港蕩之水比舊較
淺卽慮夏間或有亢暘之患是時麥田雖甚豐稔然南
方二麥用為麩蘖者多不似北方專資麵食南方惟賴
稻米北方則兼種黍稷梁粟有攜北方黍稷及蔬菜之

類至南方種植者多不收獲此水土異宜不可強也且江浙地勢卑下不雨則蒸濕人不能堪有雨則涼人皆爽豁雖地稱水鄉而水溢易洩澇歲之為患尚淺旱歲則為患甚劇北方經月不雨亦尚無礙南方夏秋間經旬缺雨則田皆坼裂禾苗漸槁矣喜雨亭記云十日不雨則無禾蓋謂此也江浙農功全資灌溉今河渠港蕩比舊俱淺者皆由素無潴蓄所致雨澤偶愆濱河低田猶可岸水濟用高仰之田力無所施往往三農坐困朕

茲為民生再三籌畫經久之計無如興水利建閘座蓄水灌田之為善也江南省之蘓松常鎮及浙江省之杭嘉湖諸郡所屬州縣或近太湖或通潮汐所有河渠水口宜酌建閘座平時閉閘蓄水遇旱則啓閘放水其支河港蕩淤淺者竝宜疏濬引水四達仍酌量建閘多蓄一二尺水即可灌高一二尺之田多蓄四五尺水即可灌高四五尺之田準此行之可俾高下田畝永遠無旱澇矣爾等其以朕意曉諭諸臣詳議以聞康熙四十六

年十一月二十三日

諭工部

朕宵旰勤民視如赤子無一時一事不思為閭閻圖經久之計江南浙江生齒殷繁地不加增而仰食者日衆其風土陰晴燥濕及種植所宜迥與西北有異朕屢經巡省察之甚悉大抵民恃田畝為生田資灌溉為急雖東南名稱水鄉而水溢易泄旱暵難支夏秋之間經旬不雨則土坼而苗傷矣濱河低田猶可戽水濟用高仰

之地力無所施往往三農坐困朕茲為民生再三籌畫
非修治水利建立閘座使蓄水以灌輸田疇無以為農
事緩急之備江南省蘇州松江常州鎮江浙江省杭州
嘉興湖州各府屬州縣或近太湖或通潮汐宜於所有
河渠水口度地建閘隨時啓閉水有餘則宣洩之水不
足則瀦蓄以備用其有支河港蕩淤淺者宜並加疏濬
使引水四達仍行建閘多蓄一二尺之水即田高一二
尺者資以灌溉矣多蓄四五尺之水即田高四五尺者

資以灌溉矣行之永久可俾高下田畝無憂旱潦此于
運道無涉而于民生實大有裨益今漕運總督與江浙
督撫方料理截漕散賑爾部速移文該督撫等令將各
州縣河渠應建閘蓄水之處並應建若干座通行確察
明晰具奏爾部即遵諭行特諭康熙四十六年十一月
二十九日

諭刑部

漕船往來河道運丁人等夾帶私錢私鹽並裝載一切

貨物遇有稽察員役動輒抗拒傷人放火誣賴沿途商民船隻悉被欺凌種種不法之事甚多朕所深悉漕運總督儻不嚴察懲處則運丁恣意橫行必致重為民害這案著該督再行確審定擬以為悍丁生事病民者之戒康熙四十六年十二月初九日

諭內閣

頃部議天保緣事革職其伯爵應照無同胞兄弟者不准承襲但念此職乃撫順額駙李永芳本身軍功所得

之職李永芳功臣也其勞績甚著朕不忍使其世職遽銷官檔爾等可令都統李正宗傳彼族人詢問何人應襲再來奏聞康熙四十六年十二月二十日

諭內閣

頃因刑部彙題內有一字錯誤朕以硃筆改正發出各部院本章朕皆一一全覽外人謂朕未必通覽每多疎忽故朕於一應本章見有錯字必行改正翻譯不堪者亦改削之當用兵時一日三四百本章朕悉親覽無遺

今一日中僅四五十本而已覽之何難一切事務總不可稍有懈怠之心也康熙四十六年十二月二十日

諭工部

河工動用錢糧輒以數萬數十萬計河官當估計時故行浮估以為日後節省之地此皆河工積弊嗣後凡有修理工程河道總督務親詣察勘確估奏聞不可一任河官浮冒侵帑康熙四十七年二月二十一日

諭兵部

朕南巡時見宣樓等應差船隻甚多在船人夫倚此為
生若盡行裁革則伊等資生無路或遇船隻朽壞酌量
停修將人夫分撥別船應用或人夫有流亡缺少停其
募補漸次裁減庶幾得宜著行文有差船地方督撫將
船隻應裁應留數目及人夫作何裁汰確議奏聞康熙
四十七年閏三月初二日

諭工部

朕南巡閱河時見洪澤湖風浪危險隄岸陡立商民船

隻觸石損壞傷人甚多朕心時切軫念因特令河臣沿湖堤創設救生木椿自設椿以來數年內並未損船傷人於商民大有裨益此椿應時加增修愈多愈善嗣後著江寧蘇州杭州三處織造每歲於節省銀內各捐五百兩解送總河衙門以備救生椿之用該督逐歲脩理存案不必入奏銷如不實行脩理於別項支用者從重治罪康熙四十七年五月初八日

聖祖仁皇帝御製文第三集卷十三

欽定四庫全書薈要

聖祖仁皇帝御製文第三集卷十四目錄

勅諭

諭九卿詹事科道

諭兵部

諭工部

諭內閣

諭吏部

諭戶部

諭刑部

諭內閣

諭戶部

諭刑部

諭浙江巡撫黃秉中

諭兵部

諭宗人府

諭兵部

諭刑部

諭兵部

諭內閣九卿等

欽定四庫全書

卷十四目錄

欽定四庫全書薈要卷一萬三千九十八

集部

聖祖仁皇帝御製文第三集卷十四

勅諭

諭九卿詹事科道

昨侍郎穆旦等審問盜賊事情擬罪具奏內賊犯王昭
駿以受偽兵備道銜問凌遲處死其伯叔兄弟皆照律
坐罪朕念太倉王姓昔在明時亦曾為大臣素稱顯族
本朝七十年以來為大臣官員者甚多並未聞有他故

今因一不肖亡賴玷辱宗族之匪類依律坐罪朕心深為不忍且為凡為大臣官員者痛之爾等會議時但將王昭駿本身及妻子定罪其伯叔兄弟俱不必議本內將朕此旨明白載入為此手書特諭康熙四十七年五月二十五日

諭兵部

臺灣總兵官員缺甚屬緊要著行福建浙江將軍總督提督令於兩省總兵官內不拘人地遴選材勇堪用者

一員速發赴任康熙四十七年六月初八日

諭工部

去歲杭州等處田畝被災民生疲敝這支河港蕩淤淺之處若勸諭百姓開濬恐地方官員藉此私派害民亦未可定況需費無多著動用正項錢糧速行疏濬康熙四十七年七月十五日

諭內閣

從前巡捕三營屬督捕管轄時營官侵蝕兵糧雖兵數

具存而京城大臣官員家丁皆充兵冒餉全無實濟積
弊沿流極其懈弛以致漢官所居地方盜賊疊告外城
官民不能聊生因而漢官具疏陳奏朕下九卿等會議
歸併前任步軍統領等令其清釐營伍選擇營弁盡力
撙稽嚴緝攘劫然後盜賊漸減官民獲安此衆所共知
著有明效者也竝非至陶和氣任內方令統轄陶和氣
一人之用舍有何關係但其人一經參劾則該部自據
定例具議絕不在於扶同附和相繼續參此風亦斷不

可長且巡捕三營官員或於各省營弁或於旗下武職
皆經朕親選壯健人才補用若果有一二驕悍不法之
人言官即當指名題參乃將百餘員之營弁三千餘名
之兵丁一概溷指以為驕悍不法可乎著仍指名具奏
況武職兵丁兵部皆可稽察步軍統領巡捕三營亦隸
於兵部誠欲建言則將兵部題參未為不可高遐昌乃
謂巡捕三營應歸併兵部所言大謬又街道事務司坊
等官管理時畏懼顯要職官賒削里巷小民止知勒索

舖戶銀錢而街道事務毫不置念因敝壞已極故亦歸併步軍統領管理今既稱商民受街道之累即著高遐昌兼管一年務令商民不致苦累街道大加肅清若果能綽然辦理誠為能言即能行之人矣下所司知之康熙四十七年七月二十五日

諭吏部

趙國祚年老致仕以後復請往出兵効力行間多有勞績恩詔所得官秩准與存留仍以二等阿達哈哈番令

其孫世昂承襲康熙四十七年八月二十日

諭戶部

據寧夏民黃品奇等叩闕之詞言都司何卜昌在任時
疏通河口連年大獲自何卜昌告退以後水澤淤塞因
而米穀薄收從前何卜昌如何疏通河渠有益於民今
應如何措置俾得永遠裨益地方著行該督撫詳察具
議以聞康熙四十七年八月二十日

諭刑部

以弟殺兄情罪重大於律斷不可恕但據稱楊榮之母
無贍養之人楊榮著暫留養母俟伊母故後該部奏聞
仍照原擬正法康熙四十七年八月二十日

諭內閣

今年秋汎黃運湖河修防平穩覽河臣奏報已悉張鵬
翮自任總河以來克遵朕指示修築工程身歷河干殫
心盡力一切動用錢糧謹嚴明晰絕無糜費比年兩河
安晏堤岸無虞深可嘉尚所帶削秩著與開復應償帑

項俱著免追下所司知之康熙四十七年十月初一日

諭戶部

朕屢次南巡見閭閻殷阜之象遠不逮於舊時故於民生風俗無不一一諮訪雖不時蠲免額賦停徵積逋僅可支吾卒歲絕無餘蓄且今承平旣久生齒日蕃食漸不充用多不給亦理勢之所必致朕每念及此未嘗不為惻然去年江南浙江二省俱被旱荒多方軫恤始蘇民困迨今歲復報潦傷旋經照例蠲賑竝下詔書留漕

資濟但歲再不登生計益匱欲令辦賦力必難供朕於
國家一切經費累年撙節帑藏充裕以此渙敷膏澤藏
富於民俾得盡力農桑衣食滋殖百姓既足國用何憂
康熙四十八年除漕糧外江南通省地丁銀四百七十
五萬四百兩有奇浙江通省地丁銀二百五十七萬七
千兩有奇著全行蠲免所有舊欠帶徵銀米仍暫停追
取此朕因江浙二省為東南重地特於格外施仁用弘
休養之至意該督撫各飭有司張示遍諭務令窮鄉鄙

屋咸共知悉儻或別借事端侵冒徵派事發定從重治罪爾部即遵諭行特諭康熙四十七年十月十六日

諭刑部

楊義曾為大臣並無罪過因其無嗣即將家產入官屢次駁察竟與查罪人家產相等殊非待大臣之道此等事關係大體若將無嗣大臣家產槩行入官日後即成定例著交與九卿將從前有無似此入官定例察明議奏康熙四十七年十一月二十日

諭浙江巡撫黃秉中

凡為督撫者但能清以持己實心辦事不交通近侍不
夤緣部院則無往而不可矣朕蒞政四十八年如爾陳
奏素無夤緣者所見不可勝數此皆浮詞耳未足為據
日後真偽當自明也至地方遇有凶荒除蠲免錢糧發
倉給米煮粥分賑別無奇策止在地方官實心奉行斯
有濟耳朕嘗南巡灼知江浙風俗如湖州地方乃係水
鄉雨水既多則魚蝦菱芡之利俱可資以度日但北方

人日止再食南方人雖遇荒歉亦必三餐州縣官平時
並不留心聽民間耗費直至窘迫始具文請題命下之
後上司又不過虛張告示而止小民無知但能現成就
食豈有長計謀生且農民愚而讀書人巧徃徃受其愚
弄至於困乏饑餓而死而終不悟所以致死之由以此
思之良可矜憫爾到地方宜令州縣官時時為百姓豫
加區畫庶幾可以有備而無患也其調補保舉之事皆
有情弊寧波府介在海濱地方緊要知府陳一夔不必

與湖州更調康熙四十八年正月二十三日

諭兵部

李芳述自簡任提督以來居官甚優訓練軍伍整肅嚴明邊鎮地方賴以安輯歷年身經行陣宣力最久頃征紅苗之役建樹功績更為顯著允稱一時名將應與卹典已有明旨本內所請事情著詳議奏聞康熙四十八年二月初四日

諭宗人府

自去年九月不幸事出多端朕深懷愧憤惟日增鬱結以致心神耗損形容憔悴勢難必愈於是概觀衆人不過為尋常虛語襲用空文此外別無良法惟貝勒胤祉

特至朕前奏稱皇父聖容如此清減不令醫人診視進用藥餌徒自勉強耽延萬國何所倚賴臣等雖不知醫理願冒死擇醫令其日加調治因痛哭陳請爰於十一月十八日始用醫藥時皇太子已經開釋遂亦同竭力趨侍晝夜不懈今朕之劇疾業已全愈從前朕之諸

子所以不封以王爵者良恐幼年貴顯必至驕泰恣意而行故封爵不踰貝勒此亦朕子之以進勉之路也今見承襲諸王貝勒貝子日耽宴樂不事文學不善騎射一切不及朕之諸子又招致種種匪類於朕諸子間肆行其讒譖交構機謀百出凡事端之生皆由五旗而起朕天性不嗜用刑威不加窮究即此輩之幸矣茲值復立皇太子大慶之日脣祉脣祺俱著封為親王脣祐脣祇俱著封為郡王脣糖脣袍脣襖俱著封為貝子

爾衙門即傳諭旨察例議奏特諭康熙四十八年三月初十日

諭兵部

方凱簡任總兵綏輯地方整飭軍伍居官甚優前於中路出師時偕前鋒兵二百人奮力進擊衆皆稱其驍勇目前諸將罕有能及之者茲以抱病力衰懇切請罷朕深惜之著加左都督致仕仍給一拖沙喇哈番以示朕優眷勞臣至意康熙四十八年四月初三日

諭刑部

卷一百四

應結之事即當議結不必數駁致增事端從前屢下嚴旨甚明這案內擒獲盜賊人等應賞之處部議應行文該撫察明照例給賞今又稱察覆到日再議殊屬不合部院大臣並不詳察事情止據司官所言即行議駁因而事務每致增多凡不當駁而駁者皆有情弊此等事情即當議結該督撫完結之處自然題報著再議具奏

康熙四十八年五月十一日

諭兵部

據張雲翼奏盜犯趙五糾聚羣兇於江浙海洋劫掠十有餘年今趙五及其黨羽十七人先後就擒並獲有船隻軍器該提督可會同兩江總督江蘇巡撫嚴審定擬具奏仍窮究餘黨協力緝捕務靖根株康熙四十八年五月二十日


諭內閣九卿等

偏沅巡撫趙申喬湖北巡撫陳詵頃有奏摺至詳問來

人稱湖廣通省早稻豐收又江西巡撫郎廷極奏摺至亦稱江西稻田甚茂及問米價却不甚賤從上江運下之米極多而江浙米價反愈貴朕為小民生計無時不軫念籌畫所以不禁上江販米令其發下者正欲江南浙江米價稍減耳今富豪人等將湖廣江西糧米大加收買各於有名馬頭房屋堆貯江楚糧米雖有發下之名而糶賣之米益少此於貧民所關甚大爾大學士九卿大臣等皆係國家倚托之人其念切民生者必與朕同

今應作何措處方於民有益可一體同心詳加講求速
議具奏此處所有大臣亦著議奏康熙四十八年七月
初七日

聖祖仁皇帝御製文第三集卷十四



總校官庶吉士臣侍朝

校對官檢討臣王鍾健

膳錄貢生臣李敬敏

欽定四庫全書叢要

集部

聖祖仁皇帝御製文三集卷十

五至
七

詳校官原任編修臣徐立綱



欽定四庫全書薈要

聖祖仁皇帝御製文第三集卷十五目錄

勅諭

諭內閣九卿等

諭內閣九卿等

諭兵部

諭河南巡撫鹿祐

諭都察院



諭大學士溫達尚書耿額

諭大學士溫達張玉書陳廷敬李光地兵部尚

書蕭永藻侍郎李先復宋駿業

諭刑部

諭戶部

諭大學士溫達張玉書陳廷敬學士塞爾圖孫

柱仇兆鰲王思軾滿丕滿寶顧悅履潘宗洛

諭吏部

欽定四庫全書薈要卷一萬三千九十九

集部

聖祖仁皇帝御製文第三集卷十五

勅諭

諭內閣九卿等

湖廣江西糧米在江南浙江販賣者甚多而米價並不
曾減令爾等會議今覽爾等與九卿所議大略相同却
於朕意迴相懸殊如爾等議將收買米石堆貯者定例
禁止儻因此借端妄行揆查則徒為衙門人役之利於

百姓絲毫無益而且有損雖將稽察不清之督撫等降處亦不知畏何濟之有爾等所議者枝葉耳根本處全未講求朕意將此米石於根本處詳加稽察則收米堆積之弊自除湖廣江西之米或江南浙江官民及貿易之人或本地百姓及他處貿易之人在某馬頭某鎮店將某家米買賣若干及姓名察明甚易行文湖廣總督巡撫江西巡撫令差賢能官員於有名馬頭大鎮店內察明買賣人姓名米數至月終即具摺奏聞江南浙江

總督巡撫處亦照此奏摺咨會若如此行而湖廣江西之米不至江南浙江販賣則更於何處販賣耶凡此米石人皆共知買賣事情不待禁約而販賣者必多似於百姓大有裨益朕此旨竝爾等所議奏摺付九卿同閱若皆以為是著交與該部將朕諭旨作速咨行湖廣江西江南浙江總督巡撫若更有應議之處著另議具奏康熙四十八年七月初十日

諭內閣九卿等

湖廣省衡州永州辰州瀏陽永興等處糧米甚多先年
征剿逆賊時百姓盡皆避匿大兵於數村莊內尋覓糧
食凡歷數月取用未竭此等地方皆有水路可通若有
通江西水路之處則湖廣督撫或難於稽查亦未可定
若該撫等親詣此等地方悉其情形更為善也康熙四
十八年七月十四日

諭兵部

國家慎簡武臣專膺閫寄惟是敕寧疆圉和輯軍民斯

於地方大有裨益而酬庸獎勲之典宜加優渥焉陝西提督潘育龍久履戎行蔚建勞績歷試重鎮克殫謀猷自擢任西秦以來御兵飭伍有勇知方邊境肅清閭閻安堵既威望之茂著亦年齒之日增茲特晉加顯秩用彰異數著授為鎮綏將軍仍管陝西提督事務以示朕隆眷老臣至意爾部即遵諭行特諭康熙四十八年八月初七日

諭河南巡撫鹿祐

督撫奉職循理不畏懼人本無所難每因部費繁多以

致不能潔已誠使實心任事專為民生則一切情面俱

不宜瞻顧近來科道糾叅皆受人指使並無從公出於

已見者督撫亦然明知某州縣居官不善必私計其人

曾有權要相託與否如有囑託便不敢糾叅賢否混淆

不能辨別皆此故耳河南俗樸民淳本易為治比年五

穀豐收今歲開歸等處雖稍被水潦已曾蠲免錢糧交

該地方官賑濟嗣後一有災傷爾即當據實奏聞不可

隱匿亦不可過實積穀備荒最為緊要但各處積穀未必皆實推陳易新之說聽之雖美而行之甚難當青黃不接時將倉穀散去儻值秋成歉收便不能還倉若再如此一年則倉穀必多虧缺設遇災荒將何賑濟爾等漢官一見倉庫虧空心中張皇因而有託人打點安排之事官聲便不能好巡撫乃地方大吏不在徒務虛文應實心籌畫思有益於民者為之況清廉不專在一己必使布按以下一併為廉吏方能有益於民所謂廉吏

者亦非一文不取之謂若纖毫無所資給則居常日用及家人胥役何以為生如州縣官止取一分火耗此外不取便稱好官其真正貪黷無忌者自當叅處若使一槩從苛糾摘則屬吏不勝叅矣至於刑獄關係民命與他事不同錢糧等項有不合處部院可以駁查刑獄命案一經勘定部中亦難更改案內但有可疑務須駁審朕即位五十年來於刑名最加慎重凡督撫陞辭之時朕每以刑名一事須至詳至慎諄諭再三爾可留心聽

讞以仰體朕矜恤庶獄之意又文武官員共事一方每
多不和總兵等官私扣月糧未足深罪文官雖極潔清
尚足自給武職有何所入儻地方有事文臣可以坐鎮
武官須有身臨鋒鏑之苦自唐以後文武始分從前文
武相兼之時可云我非武臣亦推諉他人耶爾到任務
與武臣相和兵民一視乃於地方有裨益也康熙四十
八年九月二十八日

諭都察院

通州兩岸堤工每年派官修理一年一換前旨甚明本
內未將本年所派司官明白指出含糊推諉具議殊屬
不合著都察院嚴察議奏康熙四十八年十月初二日

諭大學士溫達尚書耿額

朕觀八旗漢軍人等用於文職者多而用於武職者少
嗣後武鄉會試亦著八旗漢軍人等考試所增額數不
過數名可以收健勇人才之用於武科甚為有益康熙
四十八年十月初五日

諭大學士溫達張玉書陳廷敬李光地兵部尚書
蕭永藻侍郎李先復宋駿業

武科取士國家大典數科以來所見人才技勇漸不如
前此事關係甚重宜廣其途以備錄用如在內部院司
官筆帖式兼管武職歷陞至堂官者不乏其人在外提
督總兵官亦多起家行伍人才何定之有現在八旗監
生充甲兵者俱有入文場應試之例今直省綠旗各營
兵丁及拔補把總竝年滿千總等久在行伍多有

健勇及善射之人此等人員內有能讀書通曉文義願入武場應試者應分別令其應武鄉會試其應鄉試者即於所在充伍及出仕地方應試不必復回原籍至雲南貴州廣西等遠省來京應武會試者亦應酌定中額使不至脫科以示鼓勵如此則綠旗人員內有技勇者皆得入科目以自效而武榜人員內亦得寔有技勇之人於武科甚有裨益其福建廣東二省武進士舉人生監或兵民人等有熟諳水性練習水師事宜願於出洋

巡哨船隻隨官兵效力者如果能擒殺賊衆立有功績
著督撫察明保題具奏康熙四十八年十月初六日

諭刑部

江南浙江連歲災荒地方困苦又今年兩省疾疫盛行
人民傷斃者甚衆雖該省督撫未經奏聞朕訪知災病
之狀深用惻然民命至重朕宵旰孜孜惟以矜全百姓
為念一切刑獄奏讞尤加欽恤比年因江浙盜案疊見
凡犯盜劫者悉皆依律坐罪今閱秋審情真各案所議

情罪俱屬允協但念災荒疾病之餘復將數十罪犯一時正法朕心殊為不忍江浙兩省應處決情真人犯俱著停止一年康熙四十八年十月十六日

諭戶部

今歲入夏以後朕因南方二麥不登北地亦被微潦宵旰軫慮甚切焦勞繼而畿輔稔收三吳秋熟兼以四方奏報咸獲有年朕心始為稍慰夫水旱災傷事所時有而小民皆如赤子一以疾苦見告即不忍恣置於懷今

念江南淮安府揚州府徐州三屬地卑積水被災獨重
秋禾未播種者甚多雖本年錢糧業經全免又曾遣官
分賑而失業之民宜加格外之恩以弘愛養康熙四十
九年淮揚徐三屬邳州等十九州縣三衛額徵地丁銀
五十九萬三千八百兩有奇著通行蠲免又河南省歸
德府屬商丘等六縣山東省兗州府屬濟寧等四州縣
或被夏災或被秋災雖已各依分數例免額賦竝宜更
施膏澤用厚民生康熙四十九年商丘等縣應徵地丁

銀二十萬二千四百兩有奇濟寧等州縣應徵地丁銀一十四萬六千六百兩有奇俱著通行蠲免其應蠲免州縣有舊欠未完錢糧亦著停徵一年諭旨到日各該督撫嚴飭有司體朕殷殷軫恤災氓至意張示徧喻悉心奉行務俾窮鄉僻壤均霑實惠如有不肖官吏借端私徵者即行察參爾部即遵諭行特諭康熙四十八年十月二十五日

諭大學士溫達張玉書陳廷敬學士塞爾圖孫柱

仇兆鰲王思軾滿丕滿寶顧悅履潘宗洛

頃郝林條奏各省錢糧虧空事情彼但知州縣錢糧有
歷年虧空之弊而所以虧空之原未之知也則亦徒為
空言而已凡言虧空者或謂官吏侵蝕或謂餽送上官
此固事所時有然而地方有清正著名之督撫而所屬
官員虧空更多又何說也如趙申喬齊世武張鵬翮李
光地皆不受屬官餽遺何以州縣有司尚多虧空耶爾
等年齒雖老朕聽政日久更歷事多各州縣虧空根原

察之甚悉從前各省錢糧除地丁正項外雜項錢糧不
解京者甚多自三逆變亂以後軍興浩繁乃將一切存留
項款盡數解部其留地方者惟俸工等必不可省之經
費且節次裁減為數甚少此外一絲一粒無不陸續解
送京師雖有尾欠十數兩部中亦必令起解州縣有司
無纖毫餘地可以動支因而不得已有那移正項之事
此乃虧空之大根原也年來戶部覆本嚴查虧空錢糧
者朕從未折出蓋深晰病原在此州縣官員實多苦累

但既參虧空必須追賠如正項錢糧二千兩未完五百兩按分數議處其例甚輕若那用五百兩則處分甚重今但令之賠償足額則那移出納還充官用其罪可寬便不必深究凡事不可深究者極多即如州縣一分火耗亦法所不應取朋友交際一二十金亦法所不應受若以此法一概繩人則人皆獲過無所措手足矣且如戶部庫中錢糧歷年存積數極難清前此庫貯一二十萬兩時曾令部中盤查經一年後方始查完竟多餘銀

二十餘萬即各倉糧米亦歷年堆積陳陳相因贏餘不
少不肖官吏侵盜銀米者未嘗無人若行盤查數仍不
缺所以弊極難除總之定例所在有犯必懲其中細微
不能深究諸事大抵如此現今戶部庫銀收貯五千餘
萬兩時當承平無用兵之費又無土木工程朕每年經
費極其節省此存庫銀兩竝無別用去年蠲免錢糧至
八百餘萬而所存尚多因思從前恐內帑不足故以外
省錢糧收入戶部自今觀之亦未為盡善天下財賦止

有此數在內有餘則在外不足凡事須豫為計乃能有
備以部庫銀一二千萬兩分貯各省庫中似亦有濟儻
在外各省一旦倉猝需用反從京師解出得無有緩不
及事之慮耶此亦當於無事之時從長商確者也爾等
可將朕此旨一一向九卿等言之康熙四十八年十一
月初十日

諭吏部

漕運總督歲輸玉粒上裕京儲綏理軍民拊循丁弁職

任至為重要總督桑格自簡任治漕以來老成持重謹厚寬平殫力轉輸悉心經畫每歲身親僱運俾漕艘依期抵通十餘年間從無稽遲貽誤之事且馭衆有法卹下有恩所屬運官旗丁無不感頌愛戴真不愧為地方大吏今年齒已長而精力未衰久任勤勞良可嘉尚著特授為兵部尚書兼都察院右都御史仍加太子太保以示朝廷崇獎老臣酬庸褒勲至意爾部即遵諭行特諭康熙四十八年十一月十三日

聖祖仁皇帝御製文第三集卷十五

欽定四庫全書薈要

聖祖仁皇帝御製文第三集卷十六目錄

勅諭

諭內閣

諭戶部尚書張鵬翮內閣學士噶敏圖

諭刑部

諭工部

諭都察院

諭八旗都統副都統參領等

諭南書房侍直大學士陳廷敬等

諭吏部

諭工部

諭戶部

諭大學士溫達張玉書陳廷敬李光地學士塞

爾圖孫柱滿丕滿保王思軾顧悅履潘宗洛

諭戶部

諭戶部

諭兵部

諭刑部

諭戶部

諭兵部

諭戶部

諭兵部

諭戶部

諭兵部

諭戶部

欽定四庫全書薈要卷一萬三千一百

集部

聖祖仁皇帝御製文第三集卷十六

勅諭

諭內閣

河南地方當黃河上流最關緊要設河水有出漕旁溢之事則下流沙土易淤為患甚鉅這工程著總河親往察看仍飭該省河官沿河修防堤岸勿致疎虞下所司知之康熙四十八年十一月十八日

諭戶部尚書張鵬翮內閣學士噶敏圖

爾等到河工傳旨與總河趙世顯河工關係緊要加謹
修防不可稍有忽略宿遷以下有清水入黃河得以刷
沙遙行宿遷以上至河南一帶無清水入黃必須將兩
岸堤工小心修防令水不出漕導水由漕中行始無淤
沙之患至於黃河發水由上源寧夏而來著行文陝西
總督轉行寧夏同知遇黃河水長時將長水情形作速
報知總河河南巡撫約二十日即報到務期預為修防

康熙四十八年十一月二十四日

諭刑部

本內有兩次竊盜和尚著發往黑龍江當差定例內擺
牙喇撥什庫披甲人等脫逃刑部與該旗大臣等會同
嚴審如旗人有竊盜事出亦著照此例會同該管大臣
官員嚴加究審竊盜非過誤之罪刺字之人何容留在
京師嗣後兩次竊盜俱發往黑龍江應當差者著當差
應給與窮披甲為奴者著給與為奴康熙四十八年十

二月十一日

諭工部

盛甲等軍器關係緊要武職官員不能捐助辦製前有江南督撫捐造解送湖廣之例著交與河南巡撫與文職官員設法捐造給與該鎮康熙四十八年十二月十一日

諭都察院

光祿寺用過錢糧一兩月內令即核明奏銷前屢下諭

旨甚明今年三月內用過錢糧至今始行奏銷如此則今年用過錢糧必推諉至於明歲事關錢糧豈可遲延這遲延緣由著都察院嚴加察議具奏其本年四月以來用過錢糧著該衙門年內作速核明奏銷康熙四十八年十二月十九日

諭八旗都統副都統參領等

朕經理國家大小事務必長計遠慮期於軍民人等實能永久奉行蓋無時不籌畫於朕懷也近見八旗苟且

治生糜費極多皆因該管人員止圖利已而其族長等又不教之以忠孝為重遂爾致此頃為去冬米價騰貴令將二月應放之米於正月即行支放因而米價隨即稍減據理而論米價貴賤應與八旗人等絕不相涉今細繹其故八旗官兵將所給之米未及抵家止貪得一時小利輒行變賣在所得之利甚微而銀兩耗去米價又增於是衆皆怨悔無及將來八月之米勢必六七月間又求放給若米價仍然不減則來年之米必又與今

年相等矣方今天下承平日久戶口滋繁南方糧米連
年不到者甚多舉國中但知計利其慮及日後衆人匱
乏者竝無一人八旗官員猶如一身一家豈可一時不
相勸諭不相訓誡乎嗣後凡所關給之米務期大加節
省用至照常放米之時勿墮奸惡富豪輩收積米糧之
詭計此亦八旗人等一効力之處也朕每日進膳二次
此外不食別物煙酒及檳榔等物皆屬無用試觀衆人
於此等無用之物輒日費幾文人人詰問當無一爽又

其甚者貧而致富用必求盈且用所不當用之物中人
之產不久即罄矣此皆染於惡俗無教導之人所致爾
等俱為大臣官員有養育管理之職今兵革不用無可
効力惟廉潔自持熟練禁旅竝為衆人生計時時仰體
朕懷多方區畫似此効力不更愈於行間致命之勞績
乎朕為八旗生計慮及久遠與為天下萬民謀生計者
中外一視愛養無殊故預令爾等知之特此手書勅諭

康熙四十九年正月二十四日

諭南書房侍直大學士陳廷敬等

朕留意典籍編定羣書比年以來如朱子全書佩文韻府淵鑑類函廣羣芳譜併其餘各書悉加修纂次第告成至於字學竝關切要允宜酌訂一書字彙失之簡略正字通涉於汎濫兼之各方風土不同南北音聲各異司馬光之類篇分部或有未明沈約之聲韻後人不無訾議洪武正韻雖多駁辯迄不能行仍依沈韻朕嘗參閱諸家究心考證凡蒙古西域洋外諸國多從字母而

來音由地殊難以牽引大抵天地之元音發於人聲人聲之象形寄於點畫今欲詳略得中歸於至當增字彙之闕遺刪正字通之繁冗勒為成書垂示永久爾等酌議式例具奏康熙四十九年三月初十日

諭吏部

原任大學士李蔚贊理機務二十餘年始終恪慎懋著勤勞朕懷時切追念其孫主事李敏啓著越常格陞補提督四譯館太常寺少卿以示崇獎舊臣優錄後嗣至

意康熙四十九年三月十二日

諭工部

創鉛事情前因白爾客條奏從遼陽州改往西錦州大
碑嶺等處今又因席爾圖所奏仍議改遼陽前所奏是
則今所奏非今所奏是則前所奏非一切事務該部應
據理剖斷分別是非議處乃止就現在條奏草率具議
遽準更改殊屬不合凡部院官員及在外督撫若更換
一人皆如此頻改定例則貽誤甚多必至敗事著嚴行

申飭這事情再加確議以聞康熙四十九年三月十七日

諭戶部

漕糧例不蠲免念浙省被災之後民力艱難這緩徵漕米九萬二千餘石著免徵收康熙四十九年三月十七日

諭大學士溫達張玉書陳廷敬李光地學士塞爾圖孫柱滿丕滿保王思軾顧悅履潘宗洛

這次行取知縣人材皆堪用廖之諒鄒汝魯居官素優著以科道員缺補授其餘俱暫給知縣俸分與六部候主事缺出挨次銓補如有別項應用之處再候旨行康熙四十九年四月二十九日

諭戶部

據葉九思奏新徵錢糧俱能完納若將歷年舊欠錢糧一概徵收不能全完等語四十四年四十五年未完錢糧著照該撫所請準於四十九年徵收四十六年四十

七年錢糧亦照該撫所請準於五十年五十一年分年帶徵儻新徵錢糧不能全完該部嚴加察議以聞康熙四十九年六月初一日

諭戶部

據張伯行奏新徵錢糧俱能全納若將歷年舊欠一概徵收不能全完等語四十四年四十五年四十六年四十七年未完地丁等項錢糧著照該撫所請準於五十年起分四年帶徵四十七年漕項錢糧亦照該撫所請

準於五十三年帶徵儻新徵錢糧不能全完該部嚴加
察議以聞康熙四十九年六月初一日

諭兵部

這番人搆亂事情並非副將張宏印起釁張宏印一聞
事發即率官兵剿滅峰崖山等處番衆殲俘七十餘人
餘俱招撫甚為可嘉著降二級留任其被番人戕害守
備韓國元千總洪章高仲元皆因地方公務追逐交戰
以致身亡情屬可憫著一併議敘奏聞康熙四十九年

七月初八日

諭刑部

齊翠葛特等兩家相毆以致齊翠之弟齊文葛特之父
巴津達爾俱被毆殞命今將齊翠葛特又擬罪論死是
兩家死至四人殊可憫惻著再議具奏康熙四十九年
七月十七日

諭戶部

各省事務果有濟於兵民地方官籌畫至當即應舉行

王度昭請於鎮筵發庫銀三千兩買穀萬石建倉積貯
穀貴減價平糶穀賤買補還倉地方既大有裨益而錢
糧亦不至濫費具見實心任事可嘉著即照所請行康
熙四十九年七月二十日

諭兵部

陝西多才勇之人各營兵丁又准考試如舉人中額太
少則拔取必致遺漏人才不無壅塞著將武舉額數於
原額外增二十名康熙四十九年七月二十九日

諭戶部

這截留漕米監運至狼山乍浦著侍郎塔進泰李旭升
去仍令福建地方提督總兵官前來接運賑濟災黎事
關重大塔進泰等著先馳驛速赴福建將賑濟事宜會
同該督撫明白詳議竝料理船隻遣行再回江浙候領
運提鎮等到日以所截留之米照數交給事畢回京康
熙四十九年八月二十日

諭兵部

熟諳水性年老舊人今已殆盡沿海武職員缺甚屬緊要應如提督施世驃所請選擇諳練水性之人次第補授所司即議奏聞康熙四十九年八月二十七日

諭戶部

捐輸米穀原以貯倉備賑大小麥易於霉爛從無捐麥之例米穀價貴二麥價賤今欲捐麥代米不過便於捐納之人耳於倉廩積貯百姓賑濟竝無裨益張伯行所請殊屬不合著嚴行申飭康熙四十九年九月十六日

諭兵部

據奏八月二十五日文登營副將等報有北來鳥船七隻沙船一隻泊成山頭外洋等處二十六日賊船移入棉花島官兵攻打又遁出外洋等語地方一有賊寇即當立時題報該撫鎮彼時不即奏聞及盛京將軍題擊敗海賊餘衆遁往山東奉旨令速行細察該撫方具摺陳奏殊屬不合賊船往盛京者原從東省經過沿海官兵何以不行堵剿今賊船敗回必仍經山東江南浙江

該管各汛官兵務嚴加追擒勿致疎縱該部作速通行
康熙四十九年九月二十四日

諭戶部

朕恭膺

天眷祇承

列祖鴻庥統御萬方子育兆庶厯懷至治宵旰靡寧幸
際海宇同風邊隅嚮化遐邇中外帖然衽席之安者是
皆仰荷

天地

祖宗福佑之所致也方朕八齡踐阼之初

太皇太后問朕何欲朕對臣無他欲惟願天下治安生
民樂業共享太平之福而已迄今五十年矣惓惓此心
未嘗一日少釋每思民為邦本勤恤為先政在養民蠲
租為急數十年以來除水旱災傷例應豁免外其直省
錢糧次第通蠲一年者屢經舉行更有一年蠲及數省
一省連蠲數年者前後蠲除之數據戶部奏稱通共會

計已逾萬萬朕一無所顧惜百姓足君孰與不足朝廷
恩澤不施及於百姓將安施乎朕每歲供御所需概從
儉約各項奏銷浮冒亦漸次清釐外無師旅饗饋之煩
內無工役興作之費因以厯年節省之儲蓄為頻歲渙
解之恩膏朕之蠲免屢行而無國計不足之慮亦恃此
經畫之有素也比來省方時邁已歷七省南北人民風
俗及日用生計靡不周知而民生所以未盡殷阜者良
由承平既久戶口日蕃地不加增產不加益食用不給

理有必然朕洞矚此隱時深軫念爰不靳敷仁用甦民
力明年為康熙五十年思再沛大恩以及吾民原欲將
天下錢糧一概蠲免因衆大臣集議恐各處需用兵餉
撥解之際兵民驛遞益致煩苦細加籌畫悉以奏聞故
自明年始於三年以內通免一周俾遠近均霑德澤直
隸奉天浙江福建廣東廣西四川雲南貴州各巡撫及
府尹所屬除漕項錢糧外康熙五十年應徵地畝銀共
七百二十二萬六千一百兩有奇應徵人丁銀共一百

一十五萬一千兩有奇俱著察明全免竝歷年舊欠共一百一十八萬五千四百兩有奇亦俱著免徵其五十一年五十二年應蠲省分至期候旨行民間舊欠既經豁免嗣後每年額徵錢糧務如數全完儻完不及額或別有虧空託稱民欠則負國甚矣即責令督撫以下官員償補仍從重治罪夫地方大吏以及監司守令皆與吾民誼均休戚者也誠克體朕孳孳保赤之懷實心愛養力杜侵牟朘削則閭閻咸得衣食滋殖無有失所而

為官吏者亦身名俱泰豈非昇平樂利之盛事歟爾部
移文各督撫諭旨到日即刊刻頒布徧示窮簷令咸知
悉特諭康熙四十九年十月初三日

聖祖仁皇帝御製文第三集卷十六

欽定四庫全書薈要

聖祖仁皇帝御製文第三集卷十七目錄

勅諭

諭戶部

諭兵部

諭吏部

諭吏部

諭吏部

諭工部

諭吏兵二部

諭吏部

諭大學士溫達等

諭兵部

諭和碩顯親王顏璜等

諭和碩顯親王顏璜等

諭兵部

諭戶部

諭張鵬翮

諭大學士等

諭大學士溫達等

諭大學士溫達等

諭大學士溫達等

諭大學士溫達等

諭戶部

諭刑部

諭吏刑二部

諭刑部

諭兵部

欽定四庫全書薈要卷一萬三千一百一集部

聖祖仁皇帝御製文第三集卷十七

勅諭

諭戶部

定海總兵官吳郡願自備船隻親送浙江漕糧五萬石
乘順風速達閩省以濟饑民實心効力有裨公務深可
嘉尚著照所請速行康熙四十九年十月初九日

諭兵部

李雄久在登鎮各海岸海口險要情形早應詳察乃平日因循怠玩防範不嚴今賊船事發始借辭往沿海一路酌派巡防又身離汛地不先奏明及起程之後方行題報殊屬不合著嚴行申飭康熙四十九年十月十九日

諭吏部

田種玉効力舊臣年踰八十深可軫念其子候選州同田世元著以州同員缺即行補用康熙四十九年十月

二十日

諭吏部

蘇達海等支給錢糧年月俱准通算此等人員皆經各旗保送朕親行揀選之人見在各缺著儘先補用以示鼓勵康熙四十九年十一月初六日

諭吏部

朕每因朝列舊臣漸次衰謝時切軫懷特命內閣詢問順治年間進士所有罷職在籍者已無多人王士禎江

臯周敏政葉矯然徐淑嘉宋慶遠皆以公事註誤屏廢里居今年臻耄耄深可憫念著俱復還原職以示朕格外加恩至意康熙四十九年十二月二十一日

諭工部

御壩西壩加長工程甚屬緊要俱如該督所請及時興工修築其應用錢糧著速估奏聞河圖留覽康熙四十九年十二月二十一日

諭吏兵二部

海洋盜劫與內地江湖盜案無異該管地方文武官能加意稽察盡力搜緝匪類自無所容豈可因海洋偶有失事遂禁絕商賈貿易王懿所奏無益下所司知之康熙五十年正月二十六日

諭吏部

凡解任官員應追賠銀兩地方承追官自應嚴催依限完結今因發回本旗本籍追賠遂欲將原參承追官銷案是特希圖為承追官卸過之意如此必致互相推諉

欠愈難完此例遵行已久不可更改著仍照定例行康熙五十年二月二十八日

諭大學士溫達等

內閣翻通本事甚緊要如不得漢文意思或一二句言語翻錯於事之輕重大有關係內院侍讀學士侍讀官員俱係按俸補授之人所翻本章不甚妥當朕閱看清文多在內行走和蘇徐元夢雖係革職之員現今學翻漢文者無能過之將和蘇徐元夢補授內閣額外侍讀

學士翻改本章康熙五十年三月初一日

諭兵部

朕於水陸兵丁調用年久深悉其情事船出海洋必俟風候若不待時候不察風汛而強行之必致兵船損壞官兵係朕歷年養育之人遇賊自應効死如無賊而徒以巡哨受傷實屬可惜該總兵官須於此留意大加謹慎至製砲不應令貧乏武官捐造著該撫即行捐資辦理康熙五十年三月初三日

諭和碩顯親王顏璜等

朕自幼讀書略觀經史持身務以誠敬為本治天下務以寬仁為尚雖德之涼薄性之不敏而此心此念兢守五十年夙夜無間即纖悉細務不敢少有怠忽嘗觀古昔哲王君臨天下之久能持終者蓋鮮朕前少年時血氣方壯常毅然有矯偏治敝之意茲春秋漸高血氣漸耗胷中銳氣甚減而朝乾夕惕實與日加增今正當恪慎保終孜孜為萬姓圖治安之時也朕之御極年久皆

祖宗厚德景福積累留貽之所致此請上尊號稱賀特
虛文耳於朕躬毫無裨益史書所載慶雲靈芝天書萬
壽節朝賀加上尊號等類徒為先儒所譏竝無善處有
何所補而欲行之康熙五十年三月初三日

諭和碩顯親王顏璜等

朕於壽日停止朝賀已二十餘年茲諸王羣臣以今歲
當五十年昇平之會特請朕御殿行禮以愜中外官員
士子及兵民人等仰望之心公疏奏陳詞意誠懇朕勉

順羣情如所請行康熙五十年三月十一日

諭兵部

所議巡防事宜極其詳盡但此番捕獲洋盜皆係住居內地之人竝未盤踞島嶼其盡山花鳥山等處原無海港可以泊船今欲遣官兵鎮防巡哨一年一更換大洋之中徒勞兵力且恐致有傷損該地方文武官員惟嚴察內地奸民不致出洋盜劫則生民自然安輯著再加確議以聞康熙五十年三月二十二日

諭戸部

這項無著錢糧俱係南巡時地方官公同動用伊等不敢申明以前任官員那用虧空之項著落後任官員賠補必致科派擾害百姓此處朕知之甚悉心殊不忍這項無著十萬八千有奇銀兩免其賠補以示朕軫念官民至意康熙五十年三月二十三日

諭張鵬翮

卿簡任司農清勤恪慎積弊剔除實心盡職大有裨益

部務關係緊要料理需人雖卿父年踰八十聞精力尚健不必急請歸省康熙五十年三月二十八日

諭大學士等

朕綜理政事思以人命為重務必再三斟酌除真正死罪外其餘酌量寬宥看來偷盜人參為從者俱照例完結惟財主為首者今擬絞罪在牢者甚多此等人到秋審時亦宜赦之時值立夏漸漸炎熱監禁人犯污穢氣味易於染病致斃甚為可憐著交與刑部酌量減等議

奏完結康熙五十年四月初二日

諭大學士溫達等

此間大學士等將朕口傳旨意令在京大學士齊集九卿詹事科道掌印未掌印官員通行曉諭伊等有可言之事在九卿前各親書奏聞朕自京偶爾違和至今扶掖未能行走又兼天時亢旱日夕憂慮寢食靡寧古來君臣之義最重必明良合德方能上格

天心感召和氣不在修飾虛名也今亢暘不雨君臣宜

時相儆惕以萬民生計為憂其間念切國家不乏其人而玩泄性成者亦未必全無凡爾臣工理宜體朕孜孜憂民之念竭誠禱祝庶可望甘霖早沛耳康熙五十年五月初七日

諭大學士溫達等

現在此處大學士等將朕手書諭旨發往京城會集滿漢大學士九卿詹事掌印不掌印科道官詳晰傳諭伊等有應陳奏之事各自親書奏摺即當九卿前交明具

奏朕自京師抱恙而出今行步未健尚需人扶掖又兼
天時亢旱蚤夜焦勞以致不安寢食自古君臣之義甚
重必上下一德相成然後能感

上天之心召致和氣不在徒飾虛文務空名以從事也
今當此亢旱之際我君臣應協同心力夙夜靡寧以為
萬民籌畫生計大抵諸臣內實心以國家為念者固自
不少而秉性奸惡亦不可謂無人惟爾諸臣宜仰體朕
懷日存憂惕為羣黎竭誠祈禱庶幾甘霖可冀倖早獲

也特諭康熙五十年五月初八日

諭大學士溫達等

此案正法人犯五十餘名人數甚多若在各省完結猶可今將許多人犯俱解京正法朕心殊屬不忍況從前廣東海賊案內三十餘人止將一二人正法其餘俱發往烏喇等處為水手當差鄭盡心等非大盜竝未與官兵抗拒不過迫於饑寒搶奪食物聞得鄭盡心等漢仗俱好出首鄭盡心之高允泮能遠視五十餘里伊等俱

係熟諳水性之人今將伊等從寬免死或歸併旗下或發往盛京烏喇等處為水手當差亦可此事前止三法司議奏今著問九卿詹事科道以聞康熙五十年五月二十二日

諭大學士溫達等

張玉書耆舊老臣久任機務直亮清勤始終一節學問人品卓然不羣朕知之甚悉倚任方殷今忽病逝深切軫悼應得卹典著察例具奏康熙五十年五月二十八

曰

諭戶部

趙申喬奏稱滎澤縣被水衝地畝錢糧應行蠲免其凡
係黃河水衝地畝俱著查明報部等語從來河流原無
一定如河水遷流南岸則北岸地畝涸出河水遷流北
岸則南岸地畝涸出地方官但知衝潰地畝錢糧奏請
蠲免者甚多其衝後涸出地畝應徵錢糧之處竝無一
人奏請今永定河水引入柳谷口故狼城等處地方涸

出數千頃皆成膏腴有旗人耕種者亦有百姓耕種者
昔年草屋數椽之人今俱蓋高樓瓦舍居住矣地方官
竝未將此涸出地畝查明奏聞也朕知之雖悉未肯深
究趙申喬身為湖廣巡撫其長沙被江水衝決涸出之
地亦曾查奏乎若如所請行則各省督撫地方官必至
專以被衝地畝蠲免錢糧為事國家正賦勢必虧損朕
在九卿前原欲面詢趙申喬此奏必係與鹿祐有隙藉
之以辱鹿祐耳此事該部並不詳確議覆即照趙申喬

所請議行非特為趙申喬周旋顏面乎殊屬不合其請
調武官之處似應查明著再行確議具奏康熙五十年
六月初十日

諭刑部

部議陳四一案甚謬據現獲陳四供稱四十四五兩年
因本省不收無以度日於四十六年自山西帶領我一
族并親屬婦女子姪一百三十餘口逃在陝西慶陽府
居住二年四十八年前往河南從此流於湖廣貴州地

方等語顯係虛誑陝西等省自朕巡狩以來每年俱係大有竝無一歲歉收督撫等題報豐稔之疏現在陳四等何事受饑百餘口人飄流乃爾耶若果係饑民妻子自應徒步荷擔沿途乞食到田畝膏腴處所即當存住耕種養贍妻子度日因何又騎馬跨騾手執刀鎗周流各省且若此百什成羣越界遠行而該督撫並不奏聞地方官反給衣服盤費糧米等物由是觀之未必非因平日不能鼓動百姓之心故轉相煽誘資給以便乘機

生事為亂也且如許人衆飄流數載每日口糧若干喂馬草料若干俱從何處得來尚謂之流民可乎大學士李光地任直隸巡撫時深忿寧津縣百姓流離地方官不行揭報題叅處分始行禁止前偽朱三太子人知之者多曾有巨室交接至家供其酒食延之讀書朕無不知也此案部議將陳四等妻子各發回原籍安置伊等離家多年發回無產業度日更撥何處地畝與之耕種乎此處竝不加詳審即援今年四月釋放監禁罪人之

例混議非特廢事豈明知之而欲聽其作亂耶齊世武等罔念恩遇將事推諉自圖安逸似此草率議覆不顧顏面鄙陋極矣今刑部事件廢弛皆由齊世武卞永譽部院堂官俱朕親自擢用理應感念主德實心盡職報効今以朕為年老何能頓忘朕恩將事盡行廢弛致朕忿而誅戮悔無及矣康熙五十年七月二十二日

諭吏刑二部

督撫提鎮等平時不能撫卹百姓訓練兵丁及有事又

不能相機速行剿撫縱容賊盜滋蔓騷擾地方肆行搶奪且遲延日久不將其事奏聞乃稱百姓不廢耕織照常安業夫強盜竊盜多至三四十人百姓尚畏懼逃避況數千民人為盜搶奪豈得謂百姓不廢耕織安居樂業乎此係赫壽等掩飾已過希圖卸罪巧行誣奏甚明著該部嚴察議奏康熙五十年八月初九日

諭刑部

朕聽政多年惟孜孜期乂安萬姓故凡發政施令務以

真誠為尚儻矜憫犯法之人博取虛名夏則遇熱而審
冬則遇寒而審不時遣官恤刑督撫審擬案件復屢屬
堂司官分行駁改則貽累於兵民官驛糜費於迎送餽
遺互訐多端不知作何底止督撫之專責首在敦厚風
俗導民於善不時訓飭有司簡清詞訟速結案件不因
細事多繫妻子無辜以致蕩析家資逃匿他省即為良
吏雖不熱審亦無所關使不清本原不愛黎庶徒以熱
審為言則各省有定限竝非至熱時訊理俱先時審結

是有熱審之名而無其實益滋煩擾矣梁世勲不諳事
體輕重草率冒昧妄行具題殊屬不合理應從重治罪
但係無知陳奏著從寬免治罪康熙五十年八月十三
日

諭兵部

朕前次巡幸南省監理陞辭回任之時曾奏稱福建水
師提督有吳英陸路提督有臣料理地方可保寧謐儻
猶有盜賊之事臣無面目再覲天顏求主上寬懷等語


今盜賊竊發不能即行剿撫縱容延蔓迄今尚未盡獲
且監理居官不端殊為溺職著革職從寬免交刑部范
時崇黃秉中俱從寬免革職著各降五級戴罪効力許
鳳陳有功俱從寬免革職著各降五級戴罪圖功盜賊
務期盡行拿獲如不能盡行拿獲再加議罪康熙五十
年九月初八日

欽定四庫全書

卷十七



聖祖仁皇帝御製文第三集卷十七



總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書叢要

集部

聖祖仁皇帝御製文三集卷

十八至
二十一

詳校官原任編修臣徐立綱

欽定四庫全書薈要

聖祖仁皇帝御製文第三集卷十八目錄

勅諭

諭戶部

諭戶部

諭大學士溫達陳廷敬蕭永藻等

諭大學士溫達李光地蕭永藻

諭禮部



諭內閣

諭內閣

諭戶部等衙門

諭大學士溫達等

諭禮部

詔

恩詔

欽定四庫全書會要卷一萬三千一百二

集部

聖祖仁皇帝御製文第三集卷十八

勅諭

諭戶部

自古人臣事君必令民生疾苦具以上聞勸善懲惡屏絕私黨以愛民弭盜革除惡習敦厚風俗為務前張伯行奏稱務期家給人足仰報君恩今未及一年而遽云給足毋乃文飾太過乎嘗聞人多稱張伯行操守好又

聞江浙地方強盜竊賊紛紛叢集鄉紳兵民甚屬不安
更聞今歲錢糧未清虧欠甚多又糧船遲誤米色不堪
昔朕南巡時米價較今甚賤且竝無災侵猶慮小民窮
苦屢頒諭旨今盜賊滋蔓該撫反稱給足者無非掩飾
前言耳未必於小民實有利益也嗣後毋得如此虛詞
矜譽凡事必速行完結敦風厚俗弭盜安民催償糧船
清理錢糧以圖報効該部其嚴飭之康熙五十年十月
初一日

諭戶部

朕誕膺大統撫育寰區夙夜孜孜不自暇逸凡以為民也勤圖利濟休養安全即無水旱之虞時布寬仁之政蠲租除賦務使遐方率土無不均沾或值雨暘偶愆出帑發粟多方賑卹其有益於吾民者靡弗備舉而亟行之朕愬懇周詳之至意前四十九年所頒諭旨申晰甚明原欲將五十年天下錢糧通行蠲免以諸臣集議恐需用兵餉撥解之際兵民驛遞益致煩苦故自五十年

為始三年之內全免一週除將直隸奉天等九直省康

熙五十年地丁錢糧一概蠲免及歷年舊欠錢糧一併
免徵外山西河南陝西甘肅湖北湖南各撫屬除漕項
外五十一年應徵地畝銀共捌百肆拾萬肆千兩有奇
人丁銀共壹百貳拾萬捌千壹百兩有奇著察明全免
竝歷年舊欠共伍拾肆萬壹千叁百兩有奇亦俱著免
徵其五十二年應蠲省分至期候旨行民間舊欠既經
豁免嗣後每年額徵錢糧務如數全完儻完不及額或

有虧空託稱民欠即責令督撫以下官員償補仍從重
治罪該督撫須實心力行期副朕惓惓愛民之意如有
指稱事故侵欺科派事發之日必嚴行究治諭旨到日
徧示城郭鄉村深山窮谷咸使知悉爾部即遵諭行特
諭康熙五十年十月初三日

諭大學士溫達陳廷敬蕭永藻等

臺灣總兵官員缺殊屬緊要開列總兵官內一應調補
之人著問九卿其福建省官員亦遣人往問大學士李

光地并曉諭福建總督等將伊省武官內好者即行薦
舉勿致隱漏如果據實具奏則福建省官員懼賢否必
能直達皆勉力相率為好官矣福建地方遙遠因朕不
得親臨故優劣未能即知如監理允惡盈滿聞而褫革
之儻當伊罪未著之前先行罷黜於地方豈不大有裨
益耶定海總兵吳郡居官甚優實心効力武官內允為
第一今代攝江南提督事務江南人亦皆稱道此人不
可調補臺灣朕欲留俟要處提督用之餘著於列名人

內舉奏康熙五十年十月初九日

諭大學士溫達李光地蕭永藻

直省生員舉人增額既多赴考者較前倍衆分校官不
將卷子全閱但檢意中之人及有關節卷子呈正副主
考而主考亦止將分校官所呈卷子分別取中是以真
材屈阨今科赴考者俱嘖有怨言謂好文被房官埋沒
竟不呈送主考此皆主考官不能將卷子全閱之故也
即今朕之記性雖不及上哲猶可為中資如一日閱時

文百篇亦不能首尾全記主考官於數日之內閱卷幾
千定其次第不過隨手出序而已未必得當也此特因
出榜之期太近故耳如將出榜之期多展數日則主考
得以盡閱卷子不致真材有遺珠之歎矣爾等問九卿
具奏康熙五十年十月初九日

諭禮部

朕統御寰區撫綏萬國中外一體保育維殷惟期遐邇
咸寧共享昇平之福至於藩邦有能仰體此心修明厥

職者朕尤加意優待之茲朝鮮國王李焞自襲爵以來
慎守封圻恪循儀度歲時貢獻方物克殫悃忱四十餘
年未嘗少懈其國中之事稍有關係者必奏明仰請定
奪罔敢隱諱每於欽差人員竭盡小心倍加敬禮且撫
恤國人善於愛養所屬靡不悅服朕用是深為嘉美既
嘗曲示恩誼而值彼地饑饉又自海洋運米賑濟故舉
國人衆至今猶深感戴朝鮮貢獻朕屢加裁減以至甚
輕但國小地隘其年例貢物內有白金一千兩紅豹皮

一百四十二張猶恐艱於備辦嗣後將此二項永停貢
獻又聞朝鮮國使沿途館舍盡皆傾圯難以止宿歷年
進貢奏事人員甚為勞瘁著令各該地方官作速修葺
堅固用副朕加惠遠人至意爾部即遵諭行特諭康熙
五十年十月二十三日

諭內閣

天壇大祭朕親行禮曾有諭旨嗣因朕躬少有違和大
臣等再三奏阻故下旨遣大臣恭代朕則照常齋戒這

兩日體中安好如常更無可疑朕思天壇必親祭方展誠心朕仍親詣行禮大臣等不知朕意或又行奏阻朕今年已六十即或行禮少遲兩傍人少為扶助亦可也其速行傳諭康熙五十年十一月初十日

諭內閣

任丘文安地勢低窪素係積水之區朕所深悉因地勢處兩大河之間區處無策故令將苑家口之南數百里堤岸保固自滹沱等河至子牙河之北數百里堤岸亦

加保固或任丘文安值雨水連綿所積之水高於河水則將堤開放引水入河其河水高時聽其自落此理之所必然也至異常水患非但兩河之間不可逆料即高阜之地豈遂可恃今值無事之時毀折民間田廬墳墓挑濬河道建築堤閘以疲民力虛費錢糧是斷然不可者又奏稱宣府白溝諸河之水匯於茅兒灣經保定縣達於苑家口等語附近宣化府之河山西大同左衛馬邑等處甚多俱係沙流會於蔚州之桑乾遂成渾河永

定河其所稱諸水不知從何地越過永定河六里河涑水易水數重河道而突至保定縣耶况永定河身俱係沙土其通塞在於俄頃若必欲清理本源挑濬河道即竭盡直隸民力亦斷不能也樊紹祚不諳河務地勢冒昧生事混亂具奏不合其申飭之康熙五十年十一月二十八日

諭戶部等衙門

這口外民內有在本處納糧者亦有不納糧者其本處

納糧與否不過憑伊口說並未行文本處查明無有確據是必詳查本處方知也現今所查十有餘萬民去來無定此番行查之後還不知續來多少回去多少將伊等盡行逐回原籍可憐窮民棲止無地若聽其閑住不納錢糧如許人民似又未可至殺虎口等處守備千總把總等交與遙管頗難稽查須特設副將同知方好管轄自何溝起至何溝止副將同知各一員又自何溝起至何溝止副將同知各一員如令種地納糧其一切錢

糧詞訟人命事件著同知料理捕盜事件著副將料理
庶得明白這所奏未詳著再行確議以聞康熙五十年
十二月十二日

諭大學士溫達等

朕理事年久看得人命竝審擬事件要期當乎理而已
今陳汝咸條陳請照宋時洗冤錄較定畫一屍格除鎗
刀弓箭銅鐵等器外木棍等物俱不作兇器等語夫人
命事件將拳毆脚踢木棍毆打致死者酌其兇器之輕

重以定罪之輕重則事必致紊亂矣如針乃至微之物以針刺死者豈可因針非殺人兇器遂免其罪乎孟子云可使制挺以撻秦楚之堅甲利兵由此觀之木棍亦兇器也著問九卿康熙五十年十二月十三日

諭禮部

近見直隸各省創建寺廟者甚多建造寺廟則佔踞百姓田廬既成之後愚民又為僧道日用湊集銀錢購買貧人田地給與以致民田漸少且游民充為僧道窩藏

逃亡罪犯行事不法者甚多實擾亂地方大無益於民生者也著各省督撫及地方官除原有寺廟外其創建增修永行禁止康熙五十年十二月十五日

詔

恩詔

朕為天下生民主宵旰勤勞勵精圖治凡國家之休戚閭閻之樂利晷刻之間無不注意於此天下之大兆民之衆朕誰欺欺天乎至今四十餘載親歷饑饉者不知

其幾南北用兵者不知其幾人心向背者不知其幾天
變地震者不知其幾自責涼德不能撫育履冰臨淵兢
業惟守仰賴

上天眷佑

祖宗厚德幸生創業未久之際方免墜失今海寓昇平
年歲稍和生民俱已樂業邇來諸王大小臣工士庶因
朕五旬輿情肫切屢請加上尊號朕堅意固辭不允所
請蓋朕不以名譽稱揚為尚惟以海內富庶為心是以

屢蠲賦役頻省刑罰總欲使老安少懷風俗淳厚漸幾
於康乂隆平之治近因淮黃告成乃東南要務再授方
略望有善後朕不辭勞瘁親往閱視見畿輔山左江浙
等省耆老人民俱中心愛戴雖童穉亦咸歡欣瞻仰是
知民心皆一用是益深軫念視切如傷所以星夜回鑾
茲特大沛弘恩普施遐邇庶幾民生咸登壽域和協徧
滿寰區所有應行事例開列於後於戲安民則惠益弘
逮下之恩御衆以寬聿溥好生之德布告天下咸使聞

知康熙四十二年三月十八日

聖祖仁皇帝御製文第三集卷十八